

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA ME 2021

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

SUI LE LAULAU FONOTELE 2021



Melepone Isara FS (Teutupe), Susana & Tunumoso Iosia FT (Sui Taitaifono Toe Filifilia), Iosefa A. Uilelea FT(Taitaifono) & Tekimatang, Vavatau Taufao FS (Failautusi Aoa)



MAOTA FOU O LE GALUEGA, EFKS SAFOTU

O LE FAASINO UPU

1. O LE LAUGA	2
2. OTOOTOGA FONO TELE 2021	5
3. TOEAINA & FAIFEAU PENISIONE	6
4. A'OA'O FAAU'U FS 2021	7
5. UMUSĀ MAOTA EFKS SAFOTU	8
6. LAUGA ASO SA FONOTELE 2021	9
7. LISI O E UA MALILIU 2020-2021	12
9. O E UA FAI I LAGI FOLAUGA	15

O LE LAUGA

Tusi Faitau: Salamo 150:1-6.

MATUA: *“Ia vivi’i atu i le Alii o mea uma lava e mānava. Ia outou vivi’i atu i le Alii”.*

“Let everything that has breath praise the Lord. Praise the Lord.”

MANATU AUTU: VIIALE ALII- PRAISE THE LORD.

E masani ona ou fa’alogo i le fuaitau lea - ‘Viia le Alii’ poo le Praise the Lord, a o ou talavou ma mafuta ma isi tama ma teine, po’o ni tagata matutua foi o isi faatuatuaga o lotu ese’ese, ua fa’atutū i le matou nuu i na aso. O taimi e talanoa ai faasamasamanoa, ae ta’u ai se mea lelei sa faia e se tasi ma manuia ai se uso po o se tuafafine, ona faapea lea; ‘Viia le Alii’, pe nanu foi, ‘Praise the Lord’

E le’i auai lo’u lagona i lea viiga o le Alii e pei ona tautatala ai le vaega lea, auā e lē masani ona ou faalogo i ai i le tatou faatuatuaga ma a’oa’oga faa-EFKS, ona talanoa ma fetalia’i faapea, i le viia ole Alii, i itu aso o tafaoga ma talanoaga o aso faiso’o i ni nofoaga lautele, ma le li’o o le olaga masani. Tailo, a’o la’u lea molimau male faatauva’a, sa ou ita ma tete’e i ai, ia i latou e tautatala ai, i lea fuaitau ‘Vi’ia le Alii’ pe a fai e tagata i nofoaga faitele. Mo a’u lava ia, e pei o loo latou taufaalili, pe fai ma ulaga o agaga e a’e mai, ona fai lea ma mea mālie lea fuaitau.

Ou te manatu lava au, e ese mai le tatou fa’amamafa ma le faamamaluina o Vi’iga o le Atua, mai ia faatuatuaga male latou faamamafa. Mai le amataga, a’o iloa lautele la tatou lotu, ole Lotu Taiti (Tahiti) poo le LMS (Lonetona Misionare Sosaiete) i na aso ua mavae atu, o le anava lava Lē e viia ai le Alii, o le tapuaiga e faamamaluina, i malumalu, ma isi fa’alapotopotoga o tagata ma nofoaga, e mamalu ai le Viiga ole Atua. . . O lenei ua lauiloa le tatou ekalesia,

O le Ekalesia Faapotopotoga Kerisiano Samoa (EFKS), ma o loo i ai pea le agaga i aso ua alu, ma le amataga mai o le soifua tapuai i le Atua, ma le tatou fo’i agalotu, o le agaga e faailoa ai le Viiga o le Atua, ***o le tapuai ma le ffilemu, le āva ma le migao e tatau ai, e ave ai le Viiga i le Atua***

Tatou te viia le Atua i totonu o malumalu, ma falesa ma ona tapuaiga, e viia i totonu o Faalapotopotoga ma Sauniga faapitoa, o fonotele a le malo ma fonotele a afioaga, o auaga ma fa’atasiga a aiga taitasi, e mamalu ai lava le momoliina o le Viiga o le Atua, i le tapuaiga ma le ffilemu. Tatou te sālō pe a uma ona memumemu se tatalo lē leoa a’o lei amataina le tapuaiga. Tatou te ifo ma punonou i talosaga, o le fa’aaloalo ma le fai viiga, o le faafetai ma le faatoesega, e ave i le siufofoga mālū, o le fa’anonomanū i le Atua, ina ia faafogaina a tatou tatalo. O le vi’iga lea o le Atua, auā ua tatau ma onomea mo le tagata kerisiano, tagata ole EFKS, o loo ‘oa’oa ma se’e i maa o mālie i le alofa tausima le agalelei o le Atua i lea aso ma lea aso, ae maise Samoa lea e agiagia lava lana fu’a, fai mai ‘E FAAVAE I LE ATUA SAMOA’. Pe o toe manino se viiga o le Atua i lea fu’a? Ua tele fu’a a Saina ua agiagia i le tatou atunuu, lona uiga ua tele viiga o Saina ua maua mai ia Samoa, e i’u ai ina gau le fu’a ma le tagavai o Samoa, ‘E Faavae i le Atua Samoa, ae tuu ifo se isi fu’a, e faavae i se malo o le lalolagi nei.

Talofa e, i le viiga o le Atua, ua amata ona faoa e le tagata, ua mana’o i le pule faaletagata i le malumalu o le Atua, pule i le afioaga e afio tumau ai o Ia, o loto, finagalo ma agaga, o le palealii o ana galuega mamana. O le faia o tulafono ese’ese e le Malo, e viia ma manuia ai latou, ae ave’ese ai aiā tatau ma le mafaufau lelei o le tagata na foaiina i ai e le Atua, e fa’aaogaina ai le foafoaga. Ua o’o lava i nai taufeti’iti’i popo ma atoesi i le auala, o fua o le alofa o le Atua i le ele’ele, mo le manuia o tagata lautele, ae maise nai aiga ma afioaga e tua i le fua o faaeleeleaga, ua faalafogaina, mo nisi tupe e viia ai le Malo. Ia outou vivi’i atu i le Atua i le leo o le pu, vivi’i atu i le napeli atoa ma le kitara, vivi’i atu i le topa, le faaili ma le sumepalo leo tele. E leai ni ola o nei mea, e lē mafai fo’i ona vivi’i a latou, ae ua na o le tagata ua ave i ai e le Atua le mānava, e fa’aaogaina ai le taleni ma le atamai, e faaleo ai nei mea, e viia ai o Ia. O leo o nei mea fai faaili, ma mea ua i ai le mānava ola, e viia ai le Atua. Ua leo tele le leo o le pu, le napeli ma le kitara, le topa, le faaili ma

sumepalo, e tāla'i ai tulafono e suia ai tu ma agaifanua a Samoa, na fafau e uluai Malietoa ma tua'ā na taunuu i ai le Talalelei o le faaolataga, ae ua leo laititi le fa'aogaina mo Viiga o le Atua. Paaga masani a le Sulu Samoa, ma le au faatuatua, o tatou uma na ave i ai e le Atua le mānava ola, le palealii o Ana galuega, na foai foi i ai le mau leo 'ese'ese ma taleni e tele e vivi'i atu ai ia te Ia. Poo a mai nei aso? Tele mau leo mananaia, ua fa'aaoga sesē, ua fai ai viiga o le ola nei, ma soona lafo ai upu faamaualuluga ma le faasausili, e fa'aali ai lo latou iloa ma le malosi. Silasila i le lagi ma le vanimonimo, o loo i ai le malosi ma le mataisau o le Atua, e pei ona molimau mai le fai Salamo, ma ia matuā manatua e lē o tuufua le lagi, o loo i ai le malosi ma mea mamana a le Atua ma lona Silisili Ese.

Ia viia le Atua ona o malumalu tapuai, o galuega na aao i ai le tagata tautua ma le faatuatua faamaoni ia te Ia, e faafoi ai le viiga e ala i le tapuaiga. Sau le tala, ua aoina le po o tau faitau le palota, ua soli le Aso Sa. Ua tapuai i le palota ina ia ma'ea ona faitau, ia maua mai po o ai e malo, a'o ai e faiaina, ae galo ai le Aso Sa e tataua ona faapaiaina. O fea lou Faavae Samoa? Fai mai le Salamo, 'Ia viia le Atua i le malumalu'. Lou malumalu o lou finagalo lea, ma lo'u loto. Lou finagalo e te loto atu ai i le finagalo paia o le Atua, finagalo e tausi ai ana Tulafono, Ia e alofa atu i le Atua ma lou loto atoa, ma lou agaga atoa ma lou malosi atoa. Ia e manatua le Sapatu e te faapaiaina. Ioe Samoa e, Tausi lo ta faavae, lo'u atunuu pele. Tausi i lau tapuaiga faamaoni, ae lē o le tausi o aiaiga a le Malo e viia ai se vaega o le atunuu, ae galo ai Samoa i lona aoao, ma lana feagaiga osi ma le Atua, 'E faavae i le Atua Samoa'.

Ua ou manatua ai lo matou falesa fogafale lua sa i ai, e fa'afalelogo tetele, e pāū ma mamalu ai le falesa, ao le matou faifeau, o le toeaia o Sapolu ma le loomatua o Fa'ailoa, ma le la galuega e faamuamua le faamamaluina o le Viia o le Atua, a'o i ai foi toeaia ma loomatutua o le nuu, ma le latou foi faamamalu i le tapuaiga i le Atua, o le ifo tatalo tau memumemu, a o le'i amataina le tapuaiga. Ae le gata i lona, a o a latou lālā ofe ma mautofu u'umi, e maini ai le papatua o le tamaititi, e pisa pe pa'ō i le lotu. Ioe, o le latou faamamaluina lea o le tapuaiga, ma aoaoina ai le tinifu ma fanau a le nuu, ina ia āva ma fifilemu i totonu o falesa, o le fale o le Atua, o le Atua e ao ina viia. A manatu foi i lotu afiafi i nuu ma afioga, e ili le foafoa o le sa mo faigalotu, e le toe pa'ō pe gasē se mea e tasi, ua oo lava i taavale e afe i totonu

o le aai, e taofi, se'ia uma faigalotu. Aisea? O loo ave le viiga i le Atua, e ala i le tapuaiga filemu ma le fa'aaloalo, auā o le agaga vivi'i lea o tatou tagata. O le tapuaiga e mamalu ma le āva e filemu e tataua ai, mo le Atua. Talosia Samoa o faapena e o'o mai i nei aso. Pe ua muamua le TV ma tala fou o le vaiaso, ae faamisi le lotu, auā e lē maua ai ni tala mālie ma ni tala e fa'aauau ai le evaevaga o le afiafi. Peitai ane, o lea ua faailoa mai e le fai Salamo, 'Ia outou vivii atu i le leo o le pu, le napeli ma le leo o le kitara, le topa ma le siva, le menima, le faili male sumepalo leotele, ia vivi'i atu i le Alii o mea uma lava e mānava''

Ua leva ona tataua ona tatou viia le Atua, mai le atamai o le foafoaga a le Atua, lea ua tatou sapi ai nei. Ia viia o Ia ona o le va-nimonimo, o loo i ai lona malosi. Pe a mafaufau loloto i ai, o le lagi po o le vanimonimo, e va ai vai i lalo nei, ma vai i le vanimonimo, e maofa le lotu. Ae a lea tatou te malu ai nei i lalo o lenei lagi. Po o tatou fai viiga ea i le Alii e ala i le puipuia lelei o le ea, ma osone e maua atili ai le ea lelei mo le vanimonimo, mo lo tatou ola maloloina, ae maise lana foafoga paia? Po o ua tuu le susunuina o otaota lē talafeagai i nofoaga faitele? Po o toa'aga e totō laau, ma faasaoia, ae 'aua le faaleagaina ma le faaititia o le 'ea lelei o loo puaina mai mo le ola lelei o tagata?

Ia vivi'i atu i le Atua i lona malumalu, le tāua o falesa, le aao malosi, aao mafola ma mafaufauga sa fausia ai, ina ia faapaiaina, o le maota lea e paia, mo le viiga o le Atua. Le maota e maua i ai agaga o tagata, e fiafia e vivi'i i le Atua. Le Malumalu e afio ai le Atua.... Po o a mai nei aso i o tatou falesa ua faapaiaina? Po o viia ai le Atua i gagana ese'ese ma mafaufauga su'i fefiloi, o loo maua i lea Aso Sa ma lea Aso Sa? Poo maua se viiga o le Atua i leo ma saunoaga i fonotaga a aulotu, ma Tofiga auā le fa'aalualuina o le feau ma le Talalelei. Poo viia ea le Atua i lau teu fugalaau manogi ma laei o le malumalu o loo e aao mafola i ai i lea Aso Sa ma lea Aso Sa, mo le teuteuina o le maota o le Atua? O le talitonuga o Maori, o vaitafe, o le sami ma laau, o manu felele ma isi mea o le foafoaga, o isi ia o latou atua. Fai mai e maua mai ai le manna, poo le agaga lelei. Pe a mafaufau loloto i ai, o mea uma ia o le foafoaga paia a le Atua, lea e viia e Maori.

They love to take care of them and they said they own it. O foliga o le alofa lea i mea ia o le foafoaga, latou te manana'o i ai; ma e pele ma ia tu'umau ma i latou, pei ni meatotino moni latou te tausia. They

praise them, and believe in them, that they get the manna from them, or a good Spirit to help out with their life. Praise the Lord for the rivers, seas, beaches, trees.. etc. Fai mai le Pese a le Penina o Tiafau, ‘O ou vaitafe lemu ma le sami e iila, pe a suluia e le masina, o atu mauga lanu lauava, e atagia mai lou sami tioata, o’u folaulau ai mo ‘ou lagilagi pese, ma ‘ou faalogo i le tausagi o manulele, Samoa e, ou te alofa tele ia te oe.’

Ua atagia, le viia e le fatupese Samoa, lona atunuu e pele. Le Siosiomaga ma le foafoaga manaia o Samoa na faia e le Atua, ua faamatala ai e Alapati ma Malia, viiiga o le Atua. Praise the Lord for Samoa. Viia le Atua ona o Samoa. Po o a mai i nei aso, le mau suauu ma vailaau ua sasa’a i vaitafe ma le sami, atigi apa ma pepa iila tatia’i solo? Uma atu le faiga filifiliga, leai se vevesi poo ni taua, sa taumate i ai nisi lagona, ona o viiiga sa soona faalele ma aafia ai agaga tapuai o le mamalu o le atunuu ma le au faitatalo mo se manuia o Samoa. Viia le Atua Samoa ma le talosaga fa’auau, fai malū ou faiva, ina ia viia ai le Atua. Salamo 150 o le Salamo mulimuli lea o loo aofia uma ai Salamo o Viiga o le Atua mai lona nuu, mai ia Isaraelu, ina ua foi mai le tafega mai Papelonia.

Ps 146 – 150: O se molimau pese poo se molimau malosi o Viiga o le Atua, ona o le ofoofogia o Lona mata’isau na mafua ai lagona matagofie, ma ta’iala lelei ma faatinoga o le ola faatuatua, e fa’aaoga ai upu ma alagaupu talafeagai e viia ai o Ia. Silasila 146: Ia outou vivii atu i le Alii, Lo’u agaga e, ia e vivii atu i le Alii. 147: Ia outou vivi’i atu i le Alii, auā e lelei ona fai pesega i le Atua. 148: Ia outou vivii atu i le Alii, mai le lagi. 149: Ia outou vivii atu i le Alii i le pese fou. 150: Ia outou vivi’i atu i le Alii i lona malumalu. Ioe, o le viia o le Alii mo Isaraelu lava ia, e le o se mea faafuasei, po o se mea faato’a fafau nei, Leai. O le mea ua masani ai le nuu o le Atua, o le viiiga e fai ma fo’i i lo latou Atua, e le aunoa. Ia viia lo latou Atua e le aunoa, auā e mamalu ma Silisili ese. Ia viia le Alii, auā o Ia o le Tupu. Ia viia le Alii i mea uma o le ola, leo o le pu, napeli atoa ma le kitara, le topa ma le siva, viia i le menima ma le fa’aili, viia i le sumepalo ta’alili ma le leo tele. Le mea lea na tupu i pa maualuluga o Ieriko - fetalai le Atua, na ona ou faailo lava i le taimi e tatau ai, ona ili loa lea o pu faatamilo faa-fitu, ona malepe lea i lalo o pa o Ieriko. Faatali mai autau a Ieriko ma le malosi o le pa e puipui ai, e le’i talia i ni vai, na o le leo lava o le

pu, na o le viiiga lava o le Atua e alalaga ai e ala i le pu, lava lea ma totoe mo le tagata faatuatua, e talipupuni ai lona fili.

Le mamalu ma le Silisili ese o le Atua, ua fa’aalia, e soloia pa e lafi ai le fili. Le isi lea faailoilo o le afio mai o le Atua, ma lona Mamalu - o le iliina o le pu. E mafai foi ona tatou faapea ane, o le ilina o le pu, o le fai viiiga lea ia te Ia, ma ioeina, ua afio mai le Tupu. E tāua lo tatou faamalolosi i pese ma viiiga o le Atua, e moni e lē tāina i kitara ma ni sumepalo, ma ni fa’ili pese a le tele o falesa, ae a iloa e le faipese ma ta laau fa’aaogā isi leo mālie o okeni ma piano, aiseā e lē faailoa ai ma fa’aaogā e viia ai le Alii? Auā o mea uma e fai leo (3-5), ma fa’aaogaina e le tagata ua foai i ai e le Atua le manava ola, e ao ona viia ai o Ia. Ou te lē o toe ita pe a fai mai se tasi, ‘Viia le Alii’, i soo se taimi soo se aso ma soo se mea. Aisea? O le gagana ua leva na tatau ona ou tautala ai, ma faasoa atu ma pese ai, ma faifaipea i aso ma taimi uma. Auā ana lē seanoa le Alii na ia te a’u, ailoga poo fea se lalolagi o o’u i ai, po o iinei po o lalō. Faapena foi ona tatau ona tatou tau fai vivii i le Atua, ona o le meaalofa o le ola. Lona mataisau lelei ma le foafoaga manaia, ua saunia mo i tatou.

Fai mai Mays o se tagata poto o le Tusi Paia, o lenei Salamo o loo aumaia ai le sini o meaola uma, e lavea ai ma le tagata-sei tulou, o le vivi’i, auā o ola uma na fausia i le mataisau o le Atua, e ola foi i lalo o le pule a le Atua. The proper goal of every creature is praise-life that shaped by God’s claim, will live under God’s rule. Leai se isi aogā sili ona sa’o mo le ola, na o le vivi’i lava i le Atua. “No other use of breath, could be more right and true to life, than Praise the Lord”. O lona alofa tele mai, lona soifua ofoina mai e ala ia Iesu Keriso lona Alo pele e toatasi, lea lava tatou te i ai i le agaga o lona Toetu manumalo mai i le oti, ina ia faaolaina o tatou tagata agasala. Pe lē o se Viiga tele lea ua tatau mo le Alii? To praise God is to live, and to live, is to praise. O lou soifua ma lo’u ola, ia fai ma viiiga o le Atua. Ona o Iesu, Amene.

*Saunia: Ata Milo FS,
EFKS Otahuhu,
Matagaluega MANUKAU*

‘OTO’OTOGA O LE FONO TELE 2021

“O LE MALAMALAMA MO LANA EKALESLIA” (1 Ioane 1:5) - O le Manatu Autu lea o le Fono Tele 2021, sa tauaofia i le laumua i Malua mai le Aso Sa, 9 Me - Aso Gafua 17 Me. Sa ulua’i fuafuaina le polokalame o le Fono Tele 2021 mo le lua vaiaso e pei ona masani ai, e amata i le Aso Gafua 10 Me - Aso Faraile 21 Me. Peitai na faafuase’i ona tuuina mai le poloaiga a le Malo Samoa, mo le faia o le faiga palota lona lua a le atunuu i le Aso Faraile 21/5. O lea na toe suia ai le fuafuaga mo aso e usua ai le Fono Tele, ina ia mafai ai ona avanoa le Ekalesia mo lea faamoemoe o le atunuu. E ui lava la ina e le’i faataunuuina le palota, ae le’i toe suia ai le fuafuaga na liuliu i ai le tofa i le Laulau Fono Tele. O fonotaga a komiti ma lotu talosaga sa amata i le afiafi o le Aso Sa o Tina, i le sauniga lotu a le Au Toeaina, ma faasolo ai fono a komiti seia mae’a i le afiafi o le Aso Lua 11/5. O le taeao o le Aso Lulu 12/5 na tatala aloaia ai le Fono Tele e lana afioga i le Taitaifono susuga Tunumoso Iosia Soliola FT, sosoo ai ma le tauvalaauga. E nofoia e usufono o latou nofoa ua saunia a latou Faila o le Fono, e le Failautusi Aoa susuga Vavatau Taufao FS ma le Ofisa Tutotonu, sa galulue faasoloatoa aunoa se malolo, ina ia maua e usufono uma a latou faila. O usugafono a Matagaluega i Fafo sa mafai ona auai mai i luga o upega tafailagi i le auala o le ZOOM, ona o tapu o le Faama’i Koviti-19.

Na mae’a le faamaoniga o Iugafono o le Fono Tele 2019 ma le Fono Tele Faafuase’i 2020, ona amata lea ona tagofia o Mau mai Matagaluega ma faasolo atu ai i Mau mai Komiti. E le’i tele se taimi na alu mo malologa ma taligasua, peita’i na alofagia e le Atua le usugafono a lana Ekalesia, aua e le’i i ai lava se faalavelave/faafitauli na tula’i mai ona o lea tulaga. Na taualuga taualumaga o le ulua’i aso i le Sauniga a le Au Taumafai na taitaiina e le susuga Mafi Faamoe FS o Faasaleleaga. O le vaveao o le Aso Tofi le Sauniga Lotu a le Au Leoleo na taitaiina e le susuga Taise Ioapo FT o Aana, a o le sauniga lotu amata o le Fono Tele na taitaiina e le Toeaina Penisione o Tavita Anesone FT. Na faai’u lea aso i le Sauniga Lotu o Nuu Ese, na taitai e le susuga Kolio Sanele FS o Falealili Safata Siumu. O le Toeaina Penisione ia Toese Toailoa Peleti FT, na taitaiina le Lotu Amata o le Fono i le Aso Faraile. O lea lava aso na faataunuu ai le Sauniga mo le Au Penisione, na taitaiina e le afioga Taitaifono ia Tunumoso S. Iosia FT.

O le Aso Toona’i, 15 Me na faataunuu ai le Sauniga o le Faauuga o Faifeau o le Upu ma le Sakarameta e to’a 9 i Samoa nei (o le isi to’a 10 i Matagaluega i Fafo). Na taitai le susuga Faauuga Mata’utia FT o Faleata, o susuga Fili Matalavea FT o Malua na faitauina le Tusi Paia, a o Siolo Tauati FT o Apia na saunia le Tatalo o le Faauuga. O i latou na faaeelima: Faauuga Mata’utia FT (Faleata, Taitai o le Sauniga), Asotasi Gu Time FT (Apia Sasa’e, Taitaifono Komiti Au Toeaina), Tunumoso Iosia FT (Falealili Safata Siumu, Taitaifono Fono Tele 2021), Ailepata Leuta FT (Aana), Leaso Tupa’i FT (Faasaleleaga, Failautusi tofia Komiti Au Toeaina), Amuia Seuala FT (Itu o Tane). O le susuga Iosefa Atapana Uilelea FT (Lotofaga Lepa Aleipata, Failautusi Komiti Au Toeaina) na ia tuuina atu A’oa’o mo le faauuga - ta’ita’iina atu i totonu o le tapuaiga, tolaulauina o latou suafa ma faletua ma faamatalaga faasino ia i latou, tauaaoina atu Tusi Faamaonia i le Taitaifono Komiti Au Toeaina mo le tuuina atu i Faifeau Samoa faauuina.

O le aoauli le Sauniga Lotu mo Tupulaga Talavou a le Ekalesia, lea sa nafa ma le Matagaluega Apia Sasa’e. O le susuga Faalenuu Tagataese FS (EFKS Levili) na ta’ita’i ma saunia le Lauga (Autu - Tapena lou Talavou mo le Lumana’i), o Seilala Lumanuvae FS (Vaivase-tai) na faitauina le Tusi Paia, a o Ionatana Te’o FS (Maugafiafia) na saunia Tatalo. Sa faatumulia le Malumalu o le Fale Iupeli i Tupulaga a le Matagaluega, o i latou foi na feagai ma Faafiafiaga saunia lelei na sosoo ma le sauniga. O le Pese o le Feiloaiga na a’oa’oina e le afioga Galuvao U. Isara o le EFKS Tanoalei’a, o ia foi sa fuataimi. O Faaevagelia na saunia e Pulega Vaimauga Sisifo ma Fagaloa, o le Mauluulu na faia e le Pulega Vaimauga Sasa’e, a o le Siva Hip Hop o le Pulega Anoamaa. Malo faafetai le faafiafia. O Sauniga Lotu/ Faamanatuga o le Aso Sa na taitaiina e Faasavala Leilua FT i le Iupeli ma Auvaa Peseta FT i le Fale o Tina. O sauniga afiafi na taitai e susuga Namaia Kofe FS i le Iupeli, a o Pati Vili FT i le Fale o Tina. O le Aso Gafua na faamae’a ai mataupu o le Fono Tele, ma taualuga ai i Palota o le Teutupe ua filifilia ai le susuga Melepone Isara FS (Faiaoga Malua) ma toe filifilia ai le susuga Tunumoso Iosia FT i le tofi Sui Taitaifono. Na suia le Laulau ma faau le laei ma nofoia le nofoa o le Taitaifono 2021-2022, Iosefa Atapana Uilelea FT ma tapuni aloaia ai le Fono Tele.

TOEAINA MA FAIFEAU PENISIONE 2021

1. **Faau'uga Mata'utia Epenesa FT.** 17/5/1951
Afioga: Matautu Falealili. Faaipoipo - 23 Tese.'78
Faletua - **Maima Alatimu** - Samauga, Vaisala, Satoalepai, Sili. Talaaga o le Soifua Galue:
1980-1984: Faifeau EFKS Saleilua, Falealili
1985-2021: Faifeau EFKS Tulaele, 40 yrs 5 mth
1990-1996: KFE, Matagaluega Apia Sisifo
2003-2011: Komiti Tupe, Matagaluega Faleata
Failautusi Komiti Tupe: 5 tausaga
Taitaifono Komiti Tupe: 1 tausaga
Sui K.A.T. i le K.F.E: 6 tausaga
Failautusi Pulega Faleata Sisifo: 23 tausaga
Tofi i le Ekalesia: Faifeau Toeaina
Aulotu/Matagaluega: Tulaele, **FALEATA**.

2. **Timoteo Momoemausu Toavalu FT.** 29/12/52
Afioga: Tufutafoe, Lefagaoalii Foailalo
Faletua: **Saitutuila** - Faatoia, Saleilua Falealili.
Aso na faaipoipo ai: 23 Setema 1976.
Soifua Galue i le Ekalesia:
1989-1995: Faifeau EFKS Satuimalufilufi - 6 tausaga
1996-2021: Faifeau EFKS Mutiatele-25 tausaga
Tofi i le Ekalesia: Komiti Aoaoga Kerisiano, Toeaina
Aulotu: Mutiatele, Pulega Aleipata,
Matagaluega: **LOTOFAGALEPA ALEIPATA**

3. **Limua'a Pitulu'u Samuelu FT.** AS: 24/7/1950
Afioga: Vailoa-tai & Leone Am. Samoa, Uafato, Falevao. Lufilufi, Sapapalii, Tafua.
Faletua: **Daru Koriam Samuelu**. Faaipo.. 17 Ian '81.
Afioga: Papua Niu Kini, Pata Falelatai, Saleimoa, Ta'u Manu'a. I'u mai Malua Tesema 1981.
31 Ian. 1982: Osi Feagaiga EFKS Saoluafata.
Failautusi Pulega Ma'a, Teutupe Pulega Ma'a.
Failautusi Matagaluega Apia Sasa'e. Komiti Au Leoleo, Komiti Feau Eseese, Toeaina Pulega Ma'a.
Aulotu: EFKS Saoluafata, **APIASASA'E**.

4. **Iosefa Aneki Tui FT.** Aso Soifua: 31/8/1951
Afioga: Taputimu, Am. Samoa. Faaipoipo 9/12/17
Faletua: **Florence Lealofioamo-afo Soliai Savaiinaea Tofaeono Tui**. Afioga: Faganeanea Am. Samoa, Nu'uuli, Solosolo, Vaiala. Soifua Galue:
1985-1989: Faifeau EFKS Satuimalufilufi
1989-2021: Faifeau EFKS Vaipuna o le Ola, Hi
1989-1999: Komiti Tupe, Matagaluega Hawaii
1999-2004: Faifeau Toeaina, Pulega Hawaii Sasa'e
2004-2012: Komiti Feau Eseese.
2012-2021 Faifeau Toeaina, Pulega Hawaii Sasa'e

2016-2021: KMTA Matagaluega Hawaii
Aulotu EFKS Vaipuna o le Ola, **HAWAII**

5. **Dr. Paulo Tema Koriam FS.** AS: 22 Iulai 1950
Afioga: Saleimoa, Faleapuna, Fogapoa, Pata F/ tai, Manu'a, Leulumoega, Saanapu, Faleu Manono.
Faaipoipo (i) 18/12/'76 (Dora Koriam), (ii) 14/10/'08 (Mafutaga Koriam), (iii) 13 Fepuari 2017 -
Faletua: **Uputu'u Pouafe Koriam**. Afioga: Aai o Niue, Salesatele, Salelologa, Mulivai, Manono.
Soifua Galue: 1982-1993 Matafale EFKS Dunedin
1994-2000 Faaiga Kolisi Faafaifeau Malua.
2000-2006 Failautusi Aoa EFKS
2007-2021 Faifeau EFKS Faatoialemanu.
Tofi i le Ekalesia:

Tofia Sikolasipi EFKS Univesite Otago Niu Sila
Faia'oga, Sui Pule Kolisi Faafaifeau Malua
Failautusi Aoa EFKS
Faifeau Tausinuu EFKS Faatoialemanu, Apia
Failautusi Komiti Aoga, Taitaifono Komiti Aoga.
Aulotu: EFKS Faatoialemanu, **APIA**.

6. **Mafi Faamoetaulua Taviuni FS.** AS: 2/3/1951
Afioga: Tafitoala, Sataoa. Faaipoipo-11/12/ 1975.
Faletua: **Lepetimalo M. Faamoetaulua**.
Afioga: Sataoa. Soifua Galue i le Ekalesia:
29/1/1992 Amata galue Faifeau EFKS Fusi
1993 Taitai Auatama Pulega Safotulafai, Taitai Komiti Aoga Aso Sa & Autalavou Pulega, Teutupe Autalavou Matagaluega Faasaleleaga.
Tofi i le Ekalesia: Komiti Feau Eseese Matagaluega Faasaleleaga mo le 6 tausaga.
Aulotu: EFKS Fusi Safotulafai, **FAASALELEAGA**.

7. **Ruperake Petaia FS.** AS: 11 Aperila 1951
Afioga: Vaitele-uta, Vaiala, Leuvaa, Malie, Vaisala.
Faletua: **Mary Margraff Petaia**. Faaipoipo 30/5/87.
Afioga: Vaitele-uta, Toamua, Falelima, Sataoa, Gataivai, Falealupo. Soifua Galue i le Ekalesia:
1991 Tiakono, 1996 A'oa'o Fesoasoani
2002-2005 MTC, 2006-2007 Faatonu Sulu Samoa
2007-2009 Pule, Fale Lomitusi Malua Printing & Bk
12/9/2009-23/5/2021 Faifeau Samoa, EFKS Gagaifolevao, Pulega Lefaga, Matagaluega Aana.
Tofi i le Ekalesia: Faifeau Samoa
Aulotu: EFKS Gagaifolevao, **AANA**.

8. **Tumama Vili FT & Peka, EFKS Christchurch.**
NIU SILA SAUTE

6. O LE SULU SAMOA ME 20201

A'OA'O FAAU'U MO LE FAIFEAU SAMOA 2021

1. Arnold Jade Fautanu & Roselyn, HAWAII.

2. Charlie Banse

Nuu: Vaivase-uta (Tanoalei'a), Malie, Lepa.
Tausaga i Malua: 2015-2018
Galuega: Faia'oga Inisinia, A'oga Matata Eeseese.
Tausaga Amata: 2019, 2 tausaga le umi ona galue.
Faletua: **Malaē Banse.** Nu: Malifa, Apia.
Matagaluega o le A'oa'o & Faletua: **APIASASA'E**

3. Elekana Simeona Lealiifano

Nuu: Vaitele fou (Peteleema Fou), Auala.
Tausaga i Malua: 2015-2018.
Galuega: EFKS TV, Vaega o Polokalame.
Tausaga Amata: 2019, 2 tausaga le umi ona galue.
Faletua: **Fiailoa Twansivaugnio Lealiifano**
Nuu: Fausaga Safata, Matautu Falelatai.
Matagaluega A'oa'o & Faletua: **FALEATA.**

4. Faafetai Toleafoa & Suia, MANUKAU

5. Faalata Leumoana & Sarai, AUKILANI

6. Fatilia Fatilua & Vaituutuu, PTC FITI

7. Fauena Leilua & Leaoa, N/UELESE SISIFO

8. Harry I. Cowley & Vi'i, N/UELESE SISIFO.

9. Kuresa Tavalani

Nuu: Sataua, Salelologa, Falealupo.
Tausaga i Malua: 2013-2016.
Galuega: Faia'oga, Kolisi Papauta.
Tausaga Amata 2019, 2 tausaga le umi ona galue.
Faletua: **Easter Tavalani.**
Nuu: Lotoso'a Saleimoa, Leauvaa.
Matagaluega A'oa'o & Faletua: **MALUA.**

10. Martin Wilson Mariota & Toreka,

NIUSILA SAUTE.

11. Melepone Isara

Nuu: Vaitele fou, Pu'apu'a, Avao, Faleasi'u, Vaie'e.
Tausaga i Malua: 2013-2016.
Galuega: Faia'oga, Kolisi Faifeau Malua
Tausaga Amata: 2019, 2 tausaga le umi ona galue.
Faletua: **Tupe Tagomoa Isara**
Nuu: Lepa, Siufaga Falelatai.
Matagaluega A'oa'o & Faletua: **FALEATA**

12. Panapa Alafau

Nuu: Vaie'e, Vaovai. Tausaga i Malua: 2013-2016.
Galuega: Matagaluega A'oa'oga Kerisiano.
Tausaga Amata: 2018, 3 tausaga le umi ona galue.
Faletua: **Tema Alafau.** Nu: Lelepa.
Matagaluega: **FALEALILI SAFATA SIUMU**

13. Panapa Junior Panapa Tolua Latasi

Nuu: Elise-fou, Palauli, Salelologa.
Tausaga i Malua: 2014-2017.
Galuega: Sa galue Ofisa Tutotonu EFKS
Tausaga Amata: 2018, 3 tausaga le umi ona galue.
Faletua: **Fesu'ea'i Panapa Latasi.**
Nuu: Faga, Fasito'o-tai.
Matagaluega A'oa'o & Faletua: **FALEATA**

14. Pausa Kaio Thompson & Meilyn, AMERIKA

15. Peniamina Faalave & Rita, NIUSILA SAUTE

16. Steven Palala

Nuu: Moataa, Gagaifolevao Lefaga, Fagae'e, Si'unui,
Vailoa Faleata. Tausaga Malua: 2014-2017.
Galuega: Faifeau EFKS Salesatele (Sa galue Ofisa
Tutotonu Ekalesia). Tausaga Amata Galue 2019.
Umi talu ona Galue: 2 tausaga.
Faletua: **Meleseleisa Afi'a Palala.** Nu: Faleapuna.
Matagaluega: **FALEALILI SAFATA SIUMU.**

17. Tau Toleafoa (Desmond).

Nuu: Fausaga, Solosolo. Tausaga i Malua: 2015-2018
Galuega: Faifeau EFKS Falefa.
Tausaga Amata: 2019. 2 tausaga le umi ona galue.
Faletua: **Leinati-o le-Tuitoga Toleafoa.**
Nuu: Vaie'e, Lalomauga.
Matagaluega: **APIASASA'E.**

18. Vaegatootoo Magele

Nuu: Iva, Salelologa, Falelatai.
Tausaga i Malua: 2014-2017
Galuega: Matagaluega A'oa'oga Kerisiano.
Tausaga Amata: 2019. Umi ona galue 2 tausaga.
Faletua: **Aniva Magele** (o loo i Niu Sila)
Nuu: Letogo, Salelavalu, Matavai, Vaovai.
Matagaluega: **FAASALELEAGA**

19. Vilia Autalaga Tiitii & Ana, MANUKAU.

UMUSĀ MAOTA GALUEGA EFKS SAFOTU ITU O TANE

O le Aso Faraile 25 Me 2021 na faapaiaina ai le Maota o le Galuega, o le EFKS Safotu o loo susū ai le susuga Toeaina ia Tanielu Apineru FT ma le faletua ia Siataata. O se taeao fou lenei mo le Ekalesia, ae maise foi o le ulua'i galuega lenei ua faapaiaina e le afioga Taitaifono Fono Tele 2021-2022, susuga Iosefa Atapana Uilelea FT, ma le faletua ia Tekimatang o ia na ootiina le lipine e tatala aloaia ai le maota. O le sauniga lotu na ta'ita'iina e le susuga Panapa Too FS (EFKS Sasina), le Failautusi o le Pulega Gagaifomauga, na auai susuga Toeaina o le Matagaluega Itu o Tane faapea le aufaigaluega Faifeau ma Faletua o le Pulega. O le Tala o le Galuega sa fofogaina lava e le susuga i le Toeaina ia Apineru, na laualuga ai le agaga fia vivii ma le faafetai i le Atua, o Lona alofa ua mafai ai ona tau lau o lenei faamoemoe e pei o la le Fai Salamo, "*Afai e le atiina a'e e le Alii le fale, e galulue fua i latou o e atiina a'e.*"

Na maitauina ua faasolo lē saogalemū le maota o le galuega sa fa'aaogā, ua tataua ona fai se fale fou; sa faasaga a'e mata i mauga i talosaga molia. O le tausaga 2019 na oo mai ai le fesoasoani, e ala i le malaga mai i Samoa a le tofa Taua'i Epa Amosa ma lona uso o Taufi Samasoni Amosa i le fa'aalavelave a lo latou aiga, ma latou fai tapuaiga ai i le Aso Sa. O le avanoa lea na faatau ai loa i ai le talosaga a le susuga i le Toeaina ma le Ekalesia, mo se fesoasoani mai mo le galuega ua fia fai. Na foi le malaga i Ausetalia o loo aumau ai, ma faamaopoopo le Mafutaga a Alo ma Fanau a Safotu i Sini Ausetalia, e le'i faapito i se Ekalesia, ae faa-ogatonu i le EFKS Mt. Druitt (susuga Simeona ma Alofa Taefu FT). O le Laulau a le Mafutaga: Taitaifono - Lavea Hanipale Aleli (Metotisi), Failautusi - Samoauatasi Lolesio Timu AF, EFKS Riverstone, Teutupe - Pouniu Mose Iese TK. O le masina o Mati 2021 na taunuu mai ai le tau'a'aoga e \$231,000 mai lenei Mafutaga, ua faaopoopo atu i le \$54,000 a le Aulotu mai ana Atina'e ma Sene faaputupu, maua ai le Tupe Faavae o le galuega e \$284,000.

O le afioga i le Matuaofaiva ia Taito Tapale Lealiifano (Auala & Vaitele uta) ma le Aiga Salemalama sa fausia le maota i le 12 vaiaso. Ua faagasolo le galuega ae tatala mai e le Atua isi avanoa e tele, e fesoasoani ma lagolago atili, faa-faigofie ai le galuega, e ala i Tauofoga ma Asiga, ae a le tausiga i aso taitasi ina ia maua pea le soifua maloloina ma le malosi. O nisi nei o Tauofoga mo le galuega:

(1) Alo o le Toeaina ma le Faletua: (i) Alii oleitū Alpha Tanielu & Epi (ii) Talimailagi Lanuola (iii) Tamaalofagia Esekielu (iv) Safotu. Na latou tau'a'aoina le tinoitupe \$20,000 - faatau ai Maa ma Faamalama o le Maota.

(2) Alo, Suli & Feoi o Tuilo'a Tau & Taauta (ua maliliu) na latou ofoina mai le \$10,000 mo le Fā'alo.

(3) Alo, Suli & Feoi o Fiu Olive & Tuvao (maliliu) na latou ofoina mai le \$10,000 mo Faitoto'a uma.

(4) Laumalila Umalau (e alaala i Niu Sila) ma ona alo, na latou ofoina mai le \$6,000

(5) Aiga o le Toeaina ia Tanielu Apineru i Nofaalii na latou asia le galuega ma foa'iina le \$13,000

(6) Susuga Siolo Tauati FT & Leitufia e \$1,000.

O le aofa'i o fesoasoani pei ona ta'ua i luga e \$60,000 + \$284,000 o le tupe faavae, maua ai le aofa'iga e \$344,000 - tupe atoa na faatino ai le galuega. O le tau aofa'i o le galuega e **\$334,579**, o loo aofia ai ma le tau o le konekarate/leipa e \$93,000. O lona uiga e mae'a le galuega e leai se aitalafu o i ai, ae \$9,421 le tupe o totoe. O se tala fiafia tele lenei e saga viia ai le agalelei faamaoni o le Atua, i lana Ekalesia ma le Aulotu e 19 Matafale.

O le susuga Toeaina ia Iosefa Atapana Uilelea FT le Taitaifono o le Fono Tele, na saunoa e molio'o le faamalo ma le faafetai a le Ekalesia Aoa, i le susuga Toeaina ma le Faletua ma le paia o le EFKS Safotu i lo latou faaea Ekalesia ma le saili malo mo le Atua ma lana galuega, e ala i lenei galuega tele. Faafetai i o latou aiga ma lupe o faalele i nuu ese, i le lagolago malosi mai ua faigofie ma māmā ai le avega. Faafetai i le afioga Matuaofaiva ma le Falefa o lo latou aiga le aao sosolo, ia ma'ai pea lana peni ma sa'o pea lana vase, ia pa'ō pea lana samala ma le 'ili, e fausia ai maota mo le galuega a le Atua. Ia faamanuia tele le Atua i o latou tofi ma faiva alofilima. Ona tau'a'ao lea e le Taitaifono Fono Tele le meaalofa a le Ekalesia e \$10,000 e tusa o ana faiga faavae masani. Na tauluga le aso fiafia i le taumafataga tele ma fa'aalologa maualuluga, o taulaga osi i le Atua e ala i ta'ita'i o le Ekalesia ma le mamalu o le au valaaulia. O le susuga ia Tanielu ma Siataata na i'u mai Malua i le 1986, ma galulue loa i le EFKS Safotu i le 1987 e oo mai nei ua 34 tausaga. *Pe a uma ona outou faia o ia mea...ia i le Atua le viiga e faavavau.*

LAUGA ASO SA, FONO TELE 2021

(Saunia e Faasavala Leilua FT, EFKS Fai'ai,
Pulega Salega, FAASALELEAGA)

Tusi Faitau: 1 Ioane 1:1-10. Matua: f.1-5, *“O le mea sa i ai talu le amataga, na matou faalogologo i ai, na matou vaavaai atu i ai o matou mata, na matou matamata ai, na tagotago foi o matou lima ia le Upu o le ola, na fa'aalia mai foi le ola...matou te molimau foi i ai, ma ua matou ta'u atu ia te outou le ola faavavau, o lena sa i le Tama, a ua fa'aalia mai ia te i matou...ina ia outou mafuta faatasi ma i matou o lo matou mafuta faatasi foi o i le Tama lea atoa ma lona Alo o Iesu Keriso. O lenei foi le feau na matou faalogologo ai mai ia te ia, ma matou faailoa atu ai foi ia te outou; o le malamalama lava le Atua, ae leai lava se pouliuli.”*

Manatu Autu (Aso Sa & Fono Tele 2021): O LE MALAMALAMA MO LANA EKALEZIA.

Vaiaso - Faitauga i Totonu o Tusi Pupu'u - 2. Ala o le Alofa.

O le ā lea malamalama? E foliga o se foa'i po o se meaalofa, o se fautuaga po o se apoapoiga foi. O Ioane a la e maua ai le tali, po o le ā lea malamalama ua foa'i mai, ma ua fautuaina mai mo le Ekalesia. O loo amata le Tusi i le faailoa mai pe faamatala mai, le mea sa faalogologo i ai, sa vaavaai i ai o latou mata ma matamata ai, ma tagotago foi i ai o latou lima. Ma o le mea na faalogologo, vaavaai, ma tagotago i ai - o le Upu o le Ola. E le o mautinoa po o ai sa i ai ma Ioane i le faalogologona lea, le matamataga ma le tagotagoga lea sa fai i le Upu o le Ola (pe o sona au soo, po o ni ana uo, po o se Aulotu/Ekalesia, po o nisi o lona aiga), lea e faasino i ai le upu faia - matou - na matou faalogologo, na matou vaavaai, matou tagotago. E le o mautinoa foi, po o ai Ioane lea e tautala ma faasino i ai le Tusi. Ae o le gagana i Tusi nei a Ioane i nisi mataupu pei o le mataupu lenei, i le malamalama ma le Upu o le ola, e atagia ai le gagana ma manatu o Ioane Evagelia, ua faapea ai le toatele o le au su'esu'e ma a'u, o Ioane lava lea na tusia le Evagelia, na tusia foi Tusi Laiti nei. Atonu e lē afaina tele ia itu, ae pei o le mea tāua o loo mana'o Ioane e ta'u mai, e lē na o ia na faalogologo, vaavaai, matamata ma tagotago i le Upu o le ola, ae na latou i ai ma ni isi.

E foliga ia Ioane o se mea uiga ese na latou faalogologo i ai, e uiga ese le logo mālie ma logo lelei. O se mea foi e tulaga ese ma ofoofogia lea i la

latou vaavaai ma le matamata. O se mea foi e manaia i le tagotago le Upu o le Ola. Peisea'i o loo faapea mai Ioane, faato'a faalogo a lea i se mea faapea, faato'a vaai foi ma matamata i se mea faapea, ma faato'a tagotago a lea i se mea faapea. E lē o matua faamatalaina mai uiga ma foliga o le mea na faalogo, vaai, matamata ma tagotago i ai, le Upu o le ola. E pei o le manatu o Ioane, e lē mafai e ni upu ma se atamai ona faamatala le uiga ese ma le tulaga ese a o lea mea - le Upu o le ola. O le mea foi lea ua ia lē manofonofa ai, ae ua fia ta'u atu ma molimau atu i nisi lenei mea ofoofogia, ina ia latou o mai e faalogologo, e vaavaai ma tagotago foi latou i ai. O le mea lena ta'ua ai e Ioane, e lē na o ia sa faalogo, vaavaai ma tagotago i le Upu o le ola. Auā e lē faamaonia se mau a se toatasi, vaganā ua to'alua, pe to'atolu, pe sili atu (o le toatele o le lelei sili atu lea).

Ai foi o le mea lea ua leai ai se amataga aloaia o lana Tusi, e pei ona masani ai i tusitusiga. Ae ua amata sa'o lava i le faamatala mai o le tala i le Upu o le ola na latou faalogologo, vaavaai, matamata ma tagotago i ai. Ua lē mana'o e faamaumau se taimi, ae ia fana tonu loa le malamalama, vili tonu le ifi a Maina, ma ta'utino le solo a le tamaloa. E faatolu ona ta'u le faaupuga - matou te molimau ma ta'u atu - e iloa ai le naunau tele o Ioane e ta'u mai. I le faalogo, vaavaai ma tagotago a Ioane, o le Upu o le ola o le mea sa i ai talu le amataga. I nisi faaupuga, e leai a se isi mea na i ai talu le amataga, na o le Upu o le ola lava. A o le talitonuga (o le au Eperu ma le au faatuatua), na o le Atua lava sa i ai talu le amataga. O lona uiga, o le Atua lava lea sa faalogo, vaai ma tagotago i ai Ioane ma i latousa latou faatasi. E folia foi i le molimau a Ioane, o le Upu o le ola e fai lona tino, po o le Atua e fai lona tino, auā e lē mafai ona vaai, matamata ma tagotago i se mea e leai sona tino. E lē foi i lea, ae o le Upu o le ola o loo faailoa mai e Ioane, e gaoioi pe ola. E tautala, pese, lauga ma a'oa'o atu, lea na faalogo i ai. E savali, e galue ma siva, aua sa vaavaai ma matamata i ai. Na tagotago foi i ai, lona uiga na fepa'ia'i, pa'itino pe na militino pe fepiiti i ai, ma latou taumulimuli i ai.

O le talitonuga, e leai se tino o le upu, e le vaai foi le Atua. Ae afai na faalogologo, vaavaai ma matamata ma tagotago Ioane i le Upu o le ola, o lona uiga, o le mea o fia ta'u mai e Ioane, ua fai le tino o le Upu.

Ua liutino le Atua. O le mea ofoofogia, ua liutagata, e le o se isi auala, pei o se agelu poo se isi foliga, ae liutino lava i le tagata. O lona uiga, ia Ioane o le Upu o le ola, o Iesu lava lea po o le Tala Lelei. O le ta'ua e Ioane faapea na latou faalogologo, vaavaai, matamata ma tagotago i ai, o lona fai mai lea, e lē se tala fatu lana molimau, e lē se tala faa'ole'ole, pe se molimau pepelo, a o le tala moni lava; na faalogo ai ona taliga, na vaai i ai ona mata ma matamata i ai, o lima foi ia na tagotago i ai. A fia talitonu, ona fai leai isi tagata ia na latou i ai faatasi. E tala faasolopito le tala ia Iesu.

E lē gata sa i le amataga le Upu o le ola, ma ua liutino foi, liutino tagata, ae fai mai Ioane i le Evagelia, *“Sa ia te ia le ola, o le ola foi o le malamalama lea o tagata”* po o le manuia ma le fiafia. O le manatu o Ioane, e leai a se mea na i ai le ola, na o le Upu lava, na o le Atua, po o Iesu. Pe faapea foi, ana leai le Upu, le Atua po o Iesu, e leai se ola. A o le ā le ola sa i le Upu? O le ola mata'u, ola paia, ola mamā, ola faamaoni ma amiotonu, loto maulalo ma alofa...Pe faapea foi o le ola i le Agaga, le ola faa le Atua. O le ola lea e fai ma malamalama o le tagata, na te iloa ai mea leaga ma mea sesē, mea pi'opi'o ma amiolētonu...O le ola e manuia ai i soo se itu, ma maua ai le fiafia moni, i le ola nei taimi nei ma le lumana'i.

Ae fai mai Tusi pupu'u ia, *“Na fa'aalia mai foi le ola, na matou vaai atu, matou te molimau foi i ai.”* Ia Ioane, e pei o se ola e ese atu, e matua ese lava i lana vaai, o se ola fou a i lana vaai, o se ola e sili atu. Pei o loo faapea mai Ioane, faato'a ia vaai a lea i se ola faapea. E lē o matuā faamatalaina auiliili mai, ona ia Ioane foi, e lē mafai i ni upu ma le atamai o le tagata ona faamatala - pau lava upu e latalata i ai, o le uiga ese, ofoofogia ma isi. Lea e faai'u ai le Tusi Evagelia a Ioane i lona fai mai, *“O isi mea foi e tele na faia e Iesu, afai e tusia uma lava, o la'u taofi, e lē mafai ona ofi i le lalolagi ia tusi pe a tusia.”* Vaai la i le mata'utia! O le ola ma le soifua lea o loo taumafai le au fai Evagelia e faamatala mai. A vaai ma maitau, e tasi le ola ma le tagata, ae lē tasi se itu o faamatala ai e Mataio, Mareko, Luka ma Ioane; e tofua fai Evagelia ma le itu o loo vaai mai ai ia Iesu. Ae tulaga ese lava le vaai ma le molimau a Ioane, ona e lē o vaai Ioane i galuega a Iesu o ni vavega, ae o loo vaai i ai o ni faailoga (signs).

O faailoga ia Ioane o mea o loo fa'aailoia pe fa'aali mai ai le Atua ia i tatou. E fa'aali mai ai lona mamalu ma lona silisili ese, lona malosi ma le mata'utia, ae maise lona alofa...O faailoga foi o faailoilo, e faamaonia ai lona mafuta ma auai mai e lē gata o ananafī, a o nei foi, ma taeao ma le lumanai. E 7 faailoga: (i) liliuina o le vai e fai ma uaina, (ii) faamaloloina o le atalii o le alii mau tofi (iii) faasavali le pipili i Petesa (iv) fafagaina o le 5,000 (v) faapupulaina o le tauaso talu ona fanau mai (vi) toe faatuina mai o Lasalo mai le oti (vii) puapuaga maliu ma le toetu o Iesu. O le numera 7 o le numera atoa; ia Ioane, o le fa'aali mai o le Atua e ala ia Iesu, e le'i faataga fa'aali mai, pe na fa'aali mai na o se vaega, ae o le Atua atoatoa, na matua fofola atoa mai.

E le gata ina tulaga ese le tala a Ioane i lona fa'aaoga o faailoga, ae tulaga ese foi le amataga o ana Tusi, auā e mamao lava i tuā i le amataga o mea uma, a o le'i faia le foafoaga (*‘Sa i le amataga le Upu..O le mea sa i ai talu le amataga’*). O isi tusitala e tau lalata mai amataga, faapea le gafa o Iesu - Mataio e amata mai ia Aperamo, o Mareko e amata mai le amataga o le galuega a Iesu, o Luka e amata mai le fanau mai o Iesu, ma le gafa e amata mai ia Atamu. A faapuupu le tala a Ioane ia Iesu, e 3 a upu e faamatala ai - Upu, Ola, Malamalama.

(1) *‘Na fa'aalia mai foi le ola, matou te molimau foi i ai ma ua matou ta'u atu ia te outou le ola faavavau, o lena sa i le Tama, a ua fa'aalia mai ia te i matou, ina ia outou mafuta faatasi ma i matou, o lo matou mafuta faatasi foi o i le Tama atoa ma lona Alo o Iesu Keriso...ina ia atoatoa ai lo outou olioli.’* Ia Ioane, o le mea na fa'aali mai ma faalogologo, vaavaai, matamata ma tagotago i ai, o le Ola. Ua uma ona ta'ua le ola e uiga ese ma le fou. Ae i ai foi ma se isi faamatalaga faaopoopo o le ola lea ua aumai - fai mai Ioane, o le ola e faavavau, o le ola e le uma, e leai se gataaga, e alu pea lava pea. E i ai le talitonuga, faato'a maua i le lumana'i le ola lea e faavavau, pe a uma le ola lenei, e pei o se tau i le ola o fai nei. Ae ia Ioane, o le ola faavavau, ua oo mai, ua i iinei, i le taimi nei lava. E mafai ona maua nei ma ola ai nei, ma ola ai pea e oo i tua atu o le ola lenei. Fai mai Ioane o le ola lea sa i le Tama, po o le Atua na o Ia e faavavau; o lea sa ia Iesu, sa soifua ai a o iinei, na maliu ma toetu, o loo soifua pea e faavavau. O se mea ua uiga ese lona ofoofogia.

O le ola faavavau foi ia Ioane, e le gata o le ola e le uma, ae o le ola faavavau, o le ola mafuta, o le ola fiafia ma olioli. Sa i le Tama ma Lona Alo. Ia Ioane, o le ola faavavau, o le faailoga o le alofa o le Atua i le lalolagi o tagata, e ala i Lona mafuta mai, e ala i Lona liutino tagata. Ma o i latou e talia Lona alofa mafuta mai, latou te maua le ola lea, le ola faavavau, ma ola ai, i le ola mafuta ma le Atua iinei ma ola ai pea i tala atu. I nisi faaupuga, sa i le Tama - o loo vaai Ioane i le mafutaga o le Tolu Tasi Paia o le Atua. Na fetalai Iesu, O a'u o i le Tama, o le Tama foi o ia te a'u. O le ata manino o le mafutaga lea e faamatala e Ioane, o le faataoto a Iesu i le vine ma ona la; ma le ata a Paulo i le tino ma ona itu tino.

(2) *'O lenei foi le feau na matou faalogologo i ai...ua matou faailoa atu foi ia te outou...o le malamalama lava le Atua, ae leai se pouliuli ia te ia' (f3).* O le malamalama lava le Atua, ae leai se pouliuli. E 2 mea e faamatala ai le malamalama:

(i) o le lelei ma le matagofie (lea e faamatala ai le foafoaga), o le mamalu ma le paia, o le fiafia ma le olioli (ii) o le poto ma le atamai. A toe faapu ona faapea lea, O le lelei lava le Atua, o le mamalu ma le paia, o le fiafia lava ae leai se leaga, leai se nunumi, leai se faanoanoa. O le poto foi ma le atamai, ae leai se valea ma se mataga. O le uiga lea o le malamalama o loo faamatala ai e Ioane le Ola na fa'aali mai ia i latou. O le ituaiga malamalama o loo fa'aalia i le foafoaga a le Atua, e lelei ma matagofie, ola ma fiafia i Etena. O la le Fai Salamo, Ua tala mai e le lagi le mamalu o le Atua...Ae maise le malamalama o loo fa'aalia i le soifua o Iesu Keriso. O le molimau o lona faamasinoga, e leai se mea e ono sala ai, e leai se mea sesē, mea leaga pe matagā; na o mea sa'o, mea lelei, ma mea tonu, e sili a Iesu i mea uma, ua iloa ai Lona poto ma lona atamai - e silisili ese le matuā atamai o le Alii.

A o le isi mea uiga ese i le vaai a Ioane, o lenei malamalama, le ola lelei ma le mamalu, le poto ma le atamai, na tupu mai i lona olaga puapuagatia i le tauiviga ma le pouliuli, o amio leaga, amio sesē ma pi'opi'o o agasala. Na fanau ma pupula mai ai isi mea lelei, o le onosa'i, loto maualalo, loto tele, usiusita'i, alofa moni, faamaoni ma isi. E faapei o le ola faavavau, e faapea foi le malamalama ma soo se tasi e sului ai, e talia ma ola ai, e avea ai loa e fai ma malamalama, ma avea ai foi ma fanau ma nuu o le Atua. Ioe le Ekalesia e, o faapefea mai i tatou? Ua tatou maua ea le ola ua fa'aali mai e Iesu?

O le mea moni ua ta'ua i tatou o Kerisiano ma tagata lotu, ae le o tatou uma ua ola ai i le ola sa i le Upu o le ola, i le Tama, ola mafuta ma le ola mamā. E le o tatou uma foi ua fai ma malamalama. Auā e le o i tatou uma ua faalogo ma lagona, e le o tatou uma ua vaai ma iloa, e le o tatou uma foi ua tago ma lagona ma iloa. O le a le uiga? Ua oti - oti le faalogo, le vaai ma le tago, ua oti uma senses o le tino. Ua le toe iloa se lelei, se malamalama, ae na o le leaga ma le pouliuli. E le gata i lea, ae ua sesē mea e faalogologo i ai, e vaavaai ma matamata, e tagotago i ai. Ae o le ola lea mo le Ekalesia, o le malamalama foi lea mo le Ekalesia, o Iesu Keriso, le Upu o le ola. O le mea alofa ma le foa'i a le Atua mo Lana Ekalesia, o le fautuaga talafeagai lelei mo tatou.

Le Ekalesia pele, o le mea moni o lou valaauina lea, ia fai oe ma malamalama i le lalolagi pouliuli...o lou nafa tausi ma lau matafaioi, ia ola ai i le malamalama. Ae paga lea, e pei ua fenumia'i le Ekalesia i lona valaauina ma lana matafaioi, ua vaivai ai le susulu o le malamalama. Ia manatua e lua itu o le tupe siliva, e lua itu o le ola - o le lelei ma le leaga, malamalama ma le pouliuli. E lua lalolagi o loo i ai, o le laolagi e vaaia ma le lalolagi e le vaaia. O le lalolagi faaletino ma le lalolagi faaleagaga. O le lalolagi faaletino e leaga, e pi'opi'o (corrupt), a o le faaleagaga e leai se leaga na o le lelei, e le corrupt. O le toatele o le Ekalesia, ua fai ma matai o aiga ma nuu, ua fai ma faipule, o pule ma sui pule, tulaga aloaia i le malo, kamupani pisinisi ma faalapopotoga. Ae o loo avea foi ma tiakono, A'oa'o Fesoasoani, Ekalesia, Faiaoga Aso Sa, Taitai Autalavou...O loo tatou o i ai i totonu o ia lalolagi e 2. Ma e pei lava o iinei lea e tele ina fenumia'i ai mea, ma tele ai mea sesē ma le faalētonu, auā e ese mea e fai iinei, ese foi mea e fai iilā; e ese le ola e ola ai i le Tala Lelei, ese le ola e fai i tua i le aiga, le nuu, le malo.

Ae manatua, e leai se Savea Tuvaelua i le Alii ma le Tala Lelei, e le mafai ona auauna i ni matai/atua se to'a lua. Afai o le lalolagi, alu e fai le lalolagi, ae afai o Iesu, ia matua mulimuli faamaoni atoatoa ia te Ia. O Iesu lava na fetalai i lana tatalo faa-ositaulaga e uiga i ona soo - *'E lē ni o le lalolagi outou, faapei o a'u nei, ou te lē so le lalolagi a'u.'* O loo vaoia foi e Ioane i ana Tusi pupu'u le mana'o i le lalolagi, auā o le lēai lea o se alofa i le Atua. (itulau 14)

O E UA MALILIU 2019 - 2020 (FONO TELE 2021)

AMERIKA:

Liki L Tiatia - Toeaina Penisione
Ropati Tiatia - Toeaina Penisione
Frank Togafau - Faifeau Toeaina
Faimasasa Peniamina - Faletua
Penisione, Faiga Sone Asiata
Aoa Fesoasoani, Seumanufagai
Vaovasa Filo - Tiakono.

Ofa Atafua Tali - Faletua Tiakono
Tina Matutua: Ferila To, Gaulofo
Pa'au Vao, Valesa Vaimauga
Taaovale, Emerald Suaava
Fruean.

NIUSAUELESE SISIFO

Vaalotu Nafu'i - Faifeau Penisio
Sootuli Fiu Kolia - Faletua FT
Muliaumalu Lealii'e - Aoa F.
Seiuli Vai'au - Tiakono
Fuafiva Matafa - Tiakono Tina
Taluai Fouvale - Faletua Tiakono
Leituala Wright-Faletua Tiakono
Nemaia Esau - Ekalesia

KUINISELANI

Tiakono: Lalofau Vaō,
Tuifaasisina Prichard, Leauga
Gray, Tupuola Fatalevave
Peteru Pouono, Auvele Tuaniu,
Faletua Tiakono: Aiolupotea
Taelefusi Aiono.

KUINISELANI SAUTE

Faamomoiloto Su'a - Tiakono
Tamaitai, Ulugia Api - Tiakono
Savaiinaea Siaki Hunkin, Tiakon
Taunese Tuuga- Faletua Tiakono
Tiliga Faitele Collins-TagataLotu

VITORIA

Asofitu Lemamea-Faifeau Samoa
Lemauga Amerika - Aoa F.
Tiakono: Toonai Tafea, Siamani
Namulauulu Feo, Muliaga Esau
Tuliaupupu, Ivona Sefo -Faletua

Tiakono, Soi Malia Ale - Faletua
Tiakono, Fetuolemoana Gale
Campble - Tiakono Tamaitai
Paepaetele Talia Tumusa
Tolupeni - Tama Matua, Ana
Lialia'i - Tina Matua, Siupolu
Leua - Tina Ekalesia.

MANUKAU

Seiuli Alualu Tuilaepa - Aoa F.
Tiakono: Tuioti Feagaiga, Taotua
Lava, Muliaga Tiatia, Leala Tuiā,
Tauti Fiso, Taafua Alesana,
Maiava Mapo, Faletagoa'i
Filipi. Sapapalii Faalavaau - Tina
Tiakono, Elisapeta Alani-Faletua
Aoa Fesoasoani. Faletua
Tiakono - Luasefulu Selefuti,
SinalefolasaFaamau Tagitagiapua,
Heather Peseta, Lamisia
Lilomaiava, Faasalafa Toia
Reuelu, Fiapule Aliifaalogo,
Luasefulu Selefuti. Tina
Matutua: Malaefou Pouli, Eseta
Safa'i, Tafu Ofoia, Efo Leniu,
Aipana Talima Taalili.

AUKILANI

Iusitini Leiloa-Faifeau Nofu Aiga
Laifai Tusitala Kirifi - A'oa'o F.
Tiakono: Tuala Lave Tuala,
Liui'a Fata Seaga Iutapi,
Mulitalo Tuiloma Fata Matagai,
Seiuli Tupe Sione, Falefa
Seumanu Mulivai,
Manu'amaivasa Niko Apa,
Ainiu Tua Paulo Ainiu,
Matauitaua Pepe Lutu,
Leaupepe Papalii Paepaega
Leaupepe, Tofilau Alamutu
Liona Pou, Sofeni Fidow.
Tiakono Tina: Hinemoa Vaioge
Tiatia Prichard, Lotomau
Alopopo Ioapo Tuiafelolo
Esekielu, Su'a Faasao Kamu.

Faletua Tiakono: Rarotonga Tafa,
Lemau McCarthy, Mataoloa
Lemalu, Falefata Sesilia Leiato
Brown, Luavalu Lupe.

Tina Matutua: Lesa Isaia Puavasa
Valelia Leapai Koli, Avamua
Pasene, Aloma Sega. Tagata
Ekalesia - Mane Paulo Rimoni.

APIA SASA'E

Esekielu Situfu Tanielu - Toeaina
Penisione, Kereta Faatonu -
Faifeau Nofu Aiga. A'oa'o
Fesoasoani: Pelenato Grey,
Toaolamai Apelu, Pa'u Alapi,
Malaga Fagalei, Ligiolo Menu
Fili, Tuautu Samuelu. Faletua
A'oa'o Fesoasoani: Simalua Posea
Seumanutafa, Seupepe
Fuimaono, Faatea Siilata, I'avai
Elisa Sauafea. Tiakono: Atiifale
Ulisesse, Tulima Sa, Seinafolava
Limu, Patu Vaimasenuu Aivalu,
Te'o Richard Tapani, Loau Sa-
moa Talapusi, Levaia Taitai, Seiuli
Faoasau Purcell, Lefau Kaisa Va,
Faoasau Moke, Ape Faagalua,
Samoa Mautoatasi, Vaasili
Kaisala, Seuamuli Liomatua
Costello, Tavita Samania,
Maetaanoa Leotalelualialii Pasui
Saipale, Lenuu Isaako, Vaesavali
Sasi'u Afuvai, Leumu Pito
Malaulau, Loau Taumaloto,
Maposua Folau Fatu, Faautagia
Westbrook, Matamata Tavete,
Tafili Taufafu, Afaese Maligi,
Akaimo Sione, Leuluasi Muaulu,
Sale Aiomalaga, Seugalii Tulia,
Faualii Tanu Fa'ifa'i, Na'i
Kalopa, Fauolo Enosa, Ufi
Lafotasi. Faletua Tiakono: Jane
Iona U. Atiifale, Repeka
Muagututi'a, Taia Malutoa
Kuresa, Marie Sililoto Tole,
Mataia Piki Galuvao, Tine Faasili
Mauigoa, Naiana Kaisala, Sarai
Feilo, Eteline Muave Faatasi
Alalafaga Misa Veu, Nika Loau

Taumaloto. Tiakono Tamaita'i: Lagi Tafea, Gau Lelei Too, Soliga Taaga, Vilealavā Esaroma.

Tamā Matutua: Fuiava Masani, Matamata Tavete, Faasootauloa Tupō, Taunese Vaetia Mitai, Miriama Le'au, Ioana Inu Saufo'i, Imoa Enerē Kirisome.

Tina Matutua: Iuni Fauo'o, Lafoa'iina Alualu, Gualofa Alo Papu Vaai, Mele Titi, Tauvaga Tauai Motu, Saofaiga Moe Pe'a, Faafete Fausia Sikaleli, Amerika Ailolo Fagasa, Keiti Lome, Taumalua Vaele, Malaetele Fausia Peni, Pototauave Ti'i Taleni.

APIA

Faifeau Penisione: Lotu Uele, Siasia Leleimalefaga. Faifeau Nofa Aiga - Iusitini Leiloa. Faletua Faifeau - Seuila Siasia. A'oa'o Fesoasoani - Lualu Atonio Wulf, Puleiata Eli Tuimalealiifano, Savea'ena Ioane. Faletua A'oa'o Fesoasoani - Fiataupou Vaiouga, Tupuimatagi Etere'i Faasootauloa. Tiakono - Siatuvai Malae Akari, Li'a Aloese, Soke Taugaele Pula Tauāmoa, Senara Noaese, Tamasu Vaa, Lavea Uele, Togitoto Leiataua, Tunumafono Faalata Navy, Mati Pene Matatia, Taupa'u Atapana Po'e, Maanaima Niutovale, Kipeona Faamoe, Fetu Aliivaa, Talatupe Vainalepa Ainu'u, Talosaga Ti'avega Manu. Faletua Tiakono: Katie Tafilipepe Aimaasu, Susana Fuimaono. Tiakono Tina: Asenati Auvele, Faavae Lui. Tamā Matutua: Kenesareta Sanft, John Bosnaski, Matataualiitia Afa Lesa. Tinā Matutua: Levaopolo Su, Natia Luna'i, Aiga Tokuma, Faasulu Faasalaina, May Tuiā, Aiono Sia Malietoa, Tuauapu Afa-

masaga, Tusiga Leauga.

FALEATA

Faufau Seilala Luamanuvae - Faletua Penisione. Faafouina Epati Setefano - Faletua Faifeau. Ala Malaulau - Faletua A'oa'o Fesoasoani. Salesulu Simi - Tiakono.

Tamā Matutua: Afamasaga Manu Aulavemai, Manuleleua Vui Manuleleua. Tinā Matutua: Aniva Mata'utia, Melenaita Aiafi, Lusila Seufale.

MALUA

Filoi Sa'u - A'oa'o Fesoasoani. Taulsulu Malifa - Tiakono Tina. Tinā Matutua: Satuala Fatu, Tufi Tauli, Saofaiga Laulua Nokise, Faavale Faamausili Collins, Aitulagi Seaga, Milovale Faamausili, Salilo Satini.

AANA

A'oa'o Fesoasoani: Lemalu Sami Lemalu, Pa'u Alapi, Tautaiolevao Tautala, Nanai Lupematasila Elisaia.

Faletua Aoa Fesoasoani: Atanifa Futi Iese, Galitele Sa'u Puaavase. Tiakono: Lemalu Finau Matagi, Leautaloto Simaika Fetu, Olomanu Leo, Fui Sauaga Sitivi, Nila Misa, Lupematasila Toleafoa Sio, Taito Palota, Pa'u Lepule, Aulēmoe Olo, Sa'u Tavita Lelilio, Mapu Leolo Fetu, Taiivao Leuma, Tuiloma Talaifiti, Faitau Matagitau, Uilelea Masagaape Siatui.

Faletua Tiakono: Faaea Olomanu, Silia Eletise, Perosi Leapai Uale, Siliiafai Sa'u Tavita, Asomuamua Taatoa, Line Sa'u Falana'i, Motiana Tafā Ioselani, Silafaga Finau Sefo, Piula Kelemete. Tiakono Tina: Ana Lemamea

Neemia, Vaasa Leilua, Anamaitu Tauiliili Pasitale Sefo.

Tina Matutua: Toe Apato Mose, Fialelei Tapuala, Faataualofa Sila Tāvō, Manino Tuivaiti, Epi Nanai Tavalu, Pulemau Sila, Solomua Tologata, Tilomai Nanai, Galuega Tomane, Seutaatia Saipaia, Aifua Aupeipeigamalie Fitu, Maria Taupa'u Enesi, Faalao Mulipola Mose, Makerita Tamatimu, Asomaile Finau Pausisi, Tuna Afamasaga Fatu Vaili, Fu'a Sio.

FALEALILI SAFATA SIUMU

Luisa Petaia - Faletua Faifeau Penisione. Aoa Fesoasoani - Siliniu Lili'a Esaroma, Toleafoa Mika. Faletua A'oa'o Fesoasoani - Asomaliu Tupuola Tusa Misi Tupuola.

Tiakono: Mata'u Talia, Su'a Tasipale, Avagatootoo Faapale, Fuimaono Tau'iloto, Soi Faafetai Soi, Lotomaulalo Tuitaalili, Te'o Lauama, Su'a Niu Vili, Mati Siaki, Aotele Legalo, Mulitalo Fiti, Mulitalo Tagi, Anapu Aialii, Aliimuamua Le'uo Toaiga, Seiuli Semu, Laumatiamanu Limu, Talaepā Soisoi Stowers, Li'o Saveatama Toeleti'u.

Faletua Tiakono: Tuafu Maiava Ketu, Onofā Maiava Pili, Lauvi Otila Nomeneta, Loreta Legalo, Faafetai Mulitalo Kirifi.

Tiakono Tina: Tipesa Mati. Tina Matutua: Tuputala Fuga Ioane, Tagiilima Patea Siasia, Rosa Iona. Tamā: Muliaga Peni, Tupu Pula, Sapatū Pula.

Tina: A'eiloa Faiavalesua, Leaso Poa'i Te'o, Vao Mulitalo Taei, Siupolu Tovale Tavita, Goretti Saseve Palesoo Asera.

LOTOFAGA LEPA ALEIPATA

Toatalaesea Sauni - A'oa'o Fesoasoani. Naomi Toga Talapā-Faletua A'oa'o Fesoasoani. Tiakono - Malalatea Lino, Vaiau Faafua Mainuuti, Gu Savali Time, Aloivini Talataina.

Faletua Tiakono - June Seamalepua Ailua'i, Perive Samoa, Ane Fotua'au Tusa Seko, Sa Vaa Mainuu.

Tina Matutua - Avavili Mauigoa Tupuola, Faamigi Faasisila, Rotorua Niumata Pele, Upuese Aumua Saisola, Fiapa'ipa'i Tiumalu Amakisi, Sepoima Tulasunui Uege, Tuituilevaaotoga Lima.

FAASALELEAGA

A'oa'o Fesoasoani: Magele Peni, Magele Sauimau, Loli Ioane. Faletua A'oa'o Fesoasoani - Luafulu Lagaia. Tiakono: Tuimauga Filipo, Togaga'e Faanū, Faimanu Tui, Fonoia Segifili, Loli Matauina, Lua Tavita Kirifi, Vaa Malae, Faatōe Lealali, Lealofi Sioloa, Mumu Pa'a, Tofilau Faaifoaso, Latu Vaigafa, Apaau Feso, Malu Satunu'u, Su'a Amani Mataafa Stowers, Leuluaiailii Notoa Tipasa, Fiu Tinoifili, Mata'utia Pa'ō, Moa Semi, Mataafa Leolaga, Vaovai Pele Mailo, Sālū Tusiga, Lagaia Solomona, Lulu Enele, Tausinuu Usufono, Fuiava Tutoatasi, Taito Faamita, Leava Pusi Gafo'i, Leauvasafa Asovale, Toetagata Nime, Tea Tafuna'i, Legā Faanunu, Tofa Tapusoa Utu, Vaiōā Sione, Matafeo Pasila, Vai Auvale. Tiakono Tamaitai - Moelagi Jackson, Lefiu Sālū Finau. Faletua o Tiakono - Valu Aliielua, Faafouina Auvaa, Seina Mafuolo, Leitū Tuitino, Tina Aloiai,

Palapala Faaolatane Tanielu, Alieta Autagavaia Uiese, Malofou Mai Vala, Tioata Laga'aia, Aniva Saosili Leauga, Roseta Leava P. Gafo'i, Sina Lefano Sitiveni, Tinei Taugamalie Siaosi, Vailala Tofa Peniamina, Tuanai Sipaia.

Tamā Matutua - Sao Maipu, Mauga Taualii, I'iga Tinomalū I'iga, Unasa Tosaga.

Tina Matutua - Eseta Amituanai, Tagi Tuipea Vaaia, Migi Falemai, Piilua Suafo'a, Ulata Fepulea'i, Paulo, Saunoa Fiso Palemata, Tualagi Viliamu, Mona Lusi Tofa Mu Tausili, Palagi Tafili Toma.

ITU O TANE

Faapusa Faumuina - Faletua Penisione Malolo. A'oa'o Fesoasoani - Mauigoa Soma.

Tiakono: Sooalo Faatoafe, Filo Ailama, Pili Solomona, Paiaaau Vaivaa Sekuini, Tafaiioletagaloa Iupati Gale, Maiava Samuelu, Sua Finauga, Saunimaa Malo, Seuamuli Tunufa'i Endermann, Tulia Tanoa, Lealaiauloto Oto, Semau Sefuluiva, Letuuga Faleiva, Togoi'u Leasi Tupa'i Mose Faapuea. Faletua Tiakono: Potoa'e Asiasiga, Lanuola Manutai, Pa'i Maiava Lokeni, Meafou Faamoetauloo, Maria Faamoetauloo Siolo, Lupe Taua'i Afereti. Tama Matutua: Sooalo Ipa, Maiava Sootaga.

Tina Matutua: Leaugania Gisa, Tuleaga Semau Fili, Patisepa Sefo.

IA SILAFIA

O nisi o le aufaigaluega ua maliliu talu mai le Fono Tele 2019:

1. Apelu Lelevaga FT Penisione
2. Solomona Tuatagaloo FTP/one
3. Apineru Misipele FS
4. Susana F. Mauala, Faletua FTP
5. Susana Tauapa'i, Faletua FS

LAUGA F. TELE *(mai le 11)*

Mo Iakopo, o le ita lea i le Atua. Auā o mea o i le lalolagi, o le tu'inanau ma mea leaga. E lagolago e Paulo lenei finagalo o Iesu; fai mai a ia, *'o se ua ia Keriso o le tagata fou ia; ua mavae mea tuai...* 'Ua le toe ola ma savali i le tino, a o le agaga. O le a'oa'oga a Iesu, *'O outou o le malamalama ole lalolagi outou'* Ia Iesu, o le olaga ma le amio e fai i le Ekalesia ma le Tala Lelei, o le amio ma le ola foi lea e faasusulu i le aiga, nuu, malo, lalolagi atoa. A sulua ma latou talia, ona fai ai lea o i latou ma malamalama, fai ma soo, ma fai ai aiga lelei, nuu malamalama, atunuu ma malo amiotonu. O le finagalo o Iesu ia tasi lana fanau, faapei o i la'ua e tasi ma le Tama. Ias tasi le leoleo mamoe, tasi le lafu, o fanau o le malamalama, ae le toe i ai ni e pouliuli. *(Faauua Sulu Iuni '21)*

ATA O ITUA (ITULAU 16)

(faasolo mai luga)

1. Susuga Faauga Mata'utia FT & Maima, EFKS Tulaele, FALEATA.
2. Susuga Limua'a Samuelu FT & Daru, EFKS Saoluafata, APIA SASA'E
3. Susuga Timoteo Momoemausu FT & Saitutuila, EFKS Mutiatele, LOTOFAGA LEPA ALEIPATA, faatasi ai ma le susuga Misipalauni Faatau FT, KMTA FALEATA, ma le susuga Kirisimasi Sani FS & Viola, EFKS Ululoloa ma Siusega.
4. Susuga Dr. Paulo Korua FS & Uputu'u, EFKS Faato'ia, APIA.
5. Faamigi Fatalevave Faasisila (le Tina Matua ua fai i lagi folauga)

O E UA FAI I LAGI FOLAUGA

FAAMIGI FATALEVAVE FAASISILA

27/7/1922-18/12/2020
(98Yr + 4Mth + 22Days)

“O lē ua faamaoni ana mea e fai, e sau lava o ia i le malamalama, ia fa’aalia ana amio ina ua tataua i le Atua.” Ioa.3:21.

O Faamigi Fatalevave Faasisila o le Tina Matua o le afioaga i Lotofaga, auā le afio o le Sa’o Faapito ma le Aiga paia o Salevalasi, i la’ua na Aliimau o Faleupolu ma le mamalu o le Faleatua, susū ai Sitagata ma le Aiga Sa Sitagatā. O se tasi o toe ulutaia o le EFKS Lotofaga, le Ekalesia o loo tausia e le Susuga i le Toeaina KMTA Lotofaga Lepa Aleipata, a o le Taitaifono o le Fono Tele 2021-2022, susuga Iosefa Atapana Uilelea FT ma le Faletua ia Tekimatang. O ona tua’ā o Fatalevave Fiti & Tanu Fatalevave Fiti o Lotofaga. Na fanau mai i le Aso Tofi ae maliu i le Aso Faraile pei ona fa’aalia i luga, ua afu lona soifua ina ua 98 tausaga. O loo soifua pea lona uso o Rasela Fatalevave, le sa la’ua mafuta ma faatasi i lo latou aiga i Punaotala, Lotofaga ina ua maliliu le tuagane ia Punaotala Fatalevave ma le uso ia Taupule To’alii. Na faaipoipo atu o ia ia Fata Faasisila Tulai (ua maliu), ma la’ua fanaua ai se fanau uluola ma toatele e to’a 5 le fanau, 22 fanau a fanau, 49 fanau a fanau a fanau, ma le 2 fanau a fanau a fanau a fanau (great, great grand children),

e 78 i latou na tutupu mai ai, faapea le to’a 6 o ana fanau fai/tausi. Sa a’oa’oina o ia i le A’oga Faifeau EFKS Lotofaga e le susuga Mareko FS & Faleupolu, faapea le Tulaga Lua Lotofaga. O se tina sa iloga lona tula’i mai i le fa’aaogaina o lona malosi ma agavaa faa-talavou, i le tau faato’aina ma ati a’e lona aiga, e le gata i ona nafa tau tina, ae sa faapea foi i le faia o faatoaga, lafu manu, e oo i le fagotaina o le gataifale e tausai ai le aiga ma tautua ai lona alii, o matai, le sa’o o le aiga, ae maise o lana feagaiga taulagi ma lana Ekalesia. O se tina e alofa faamaoni i lona aiga ma lana fanau, i le taumafaiga o latou soifua a’oa’oina ma le soifua faaleagaga. Sa maoa’e lana taitaiga ma le tautua ao tulai mai i le faiganuu a Tina ma le saofaiga a Faletua ma Tausi, Sa’oao ma Tamaita’i, mai lava i taimi o feagai ma le afioga Fiamē Mataafa Faumuina Mulinuu II ma lana masiofo, le Tofa Lauu Fetauimalemau Mataafa, seia oo mai i le afioga Fiamē Naomi Mataafa, le ulua’i Palemia Tamaita’i o Samoa. O se Tina e fiafia ma to’aga i tapuaiga i le Atua i Aso Sa ma sauniga faapitoa; e a’oa’o ma faamalosi i le fanau ma le aiga i le tautuaina o le Faifeau ma le Ekalesia, ia o faatasi le faamasani e fai taulaga i le Atua ma le fai o amio lelei i luma o le Atua. Na faato’a le toe auai i tapuaiga faitele ina ua faataotolia i ona gasegase ma ua matua lava lona soifua. Faafetai i le tausiga a le fanau, e pei o le afioga Lolofietele Toulī Dr. Toloa Enosa ma lona tausai, le Fetalaiga ia Fatalevave Ianesi (grandchild).

O ona toe sauniga sa faia i le Aso Toonai 19 Tesema 2020 i le malumalu o lana Ekalesia pele, EFKS Lotofaga na ta’ita’iina e lana Feagaiga susuga Iosefa Uilelea FT. Na lagolago i ai le susuga Vaigafa Paleono FS (EFKS Vaovai), Pastor Kirisimasi AOG Lotofaga ma le afioga i le Tiakono Katoliko Lotofaga. Na molimau i lona soifuaga le toatele o le fanau ma aiga i Samoa nei faapea i latou mai atunuu mamao e ala i fesootaiga faaonaponei. O molimau uma e ‘auga i le loto faafetai i le Atua ona o Lana meaalofa e ala i lo latou tina, o lana sailiga malo lenei ua faaeaina ma siitia maualuga ai lo latou aiga i soo se tulaga.

Na molimau le susuga Toeaina Iosefa ma le Faletua ia Teki, talu ona taunuu atu i Lotofaga i le 1989 e oo mai nei, sa vaia se tina e sili ona mata’u ma alofa i le Atua. O se tina amio lelei ma galue faamaoni, e aao mafola ma lima foa’i mea e sili ona lelei mo le Atua, e ala i ana faiga taulaga ae maise lona alofa i le auuuna a le Atua. E fiafia e mafuta, talanoa ma fautua i le faifeau ma le faletua. Ua maliu fiafia, ua mae’a le galuega o le malumalu sa naunau ma fesili soo ai, a o faata’otolia i lona falaefu. Talofa e, ua maliliu toa na latou asaina le vao filifili o le tau atiina a’e o aiga ma nuu, ae maise le galuega a le Atua. Ua fai lona soifua ma fetu pupula pea i le soifua o alo ma fanau o augatupulaga tuufaasolo o lona aiga ma lona nuu. Na faai’u i lona oliolisaga tumau i lona aiga i Punaotala, Lotofaga. ***E Tumau le Faamoemoe ia Iesu, Tatou te toe Feiloa’i ai.*** F.Sulu

NISI O LE AU PENISIONE 2021



O E UA FAI LAGI FAAMIGI FATALEVAVE FAASISILA

